

Ora a kima Momo el a instrui SMAC pa cuminsa traha mesora pa Carnaval 70





ORANJESTAD (AAN): Diadomingo anochi riba Carnival Harbour Arena tabata tin Kimamento di Momo. Di e forma ey aa duna fin na Carnaval 69 y ya caba preparando pa loke ta bay bira Carnaval 70 na 2024.

Aunke mayoria publico a stop di balia banda di ex-DOW, toch tin algun cu a sigui cana bay pabao pa asina subi Harbour Arena pa e kimamento di Rey Momo.

Pues di e forma ey, publico carnavalesco den un tremendo ambiente a yama ayo na Carnaval 69. Esaki a socede den presencia di varios monarca, miembronan di SMAC, gruponan musical, cu a sigui entretene y laga nan balia contento di por a mira un carnaval cu a bin bek yen di expectativa pero tambe ideanan nobo.

Tuma nota cu Parada Grandi di Carnaval 70 otro aña, lo bay ta mas trempan aun! E lo ta Diadomingo 11 di Februari 2024.



#Carnaval

Testament di Rey Momo

Ami Momo, Rey di caminda y di ambiente ta duna su testament pa finalisa Carnaval 69. Prome cu kima Momo, mi ta desea di laga varios punto cu Momo ta desea pa nos traha riba dje pa asina prepara pa Carnaval 70.

(1) Momo a instrui SMAC cu nan no mag tuma mas cu un luna di vakantie pa asina cuminsa traha mesora pa Carnaval 70, cu ta carnaval di lustro.

(2) Momo ta contento di mira cambio haci den carnaval, Momo ta consciente cu hopi hende no kier bay cu cambio, pero mester corda cu mundo ta sigui draai, despues di 2 aña nos ta outside again. Great di por a mira tur reina den mesun costum pa luci riba escenario.

(3) Despues di disfruta di tur parada escolar y mira con e hobennan a gosa, Momo ta kere cu lo ta un bon idea otro aña Carnaval 70 trece back e teener parade. Momo ta convenci cu scolnan por uni pa bin cu ideanan inovativo pa di un jump up por hacie un parada escolar.

(4) Mi no sa si mi a yega di confesa esaki pero Momo tin miedo di spiroto, pero for di ora mi a scucha Casper den luna di November den Centro di Barrio Playa Pabao, Momo a haya un nice y good feeling, ken por a pensa cu un hoben cu ta sali Rookie ta bay cu e corona di Soca 2023. Momo ta spera cu hobennan sigui bin cu iniciativa pa participa den e festival mas grandi di Carnaval cu ta Caiso y Soca, Momo kier sigui conta cu nos hobennan.

(5) Momo ta felicita tur grupo di Carnaval cu a participa. Tur grupo cu a trece nan creatividad, Momo ta hopi orguyoso di boso y tur grupo cu e aña aki no a make it, cuminsa traha di awor pa boso tambe por luci den Carnaval 70.

(6) Momo ta bisa di ta basta preocupa cu e uso excesivo di alcohol meymey di e adulto hobennan y tambe e uso exagera di alcohol durante paradanan di anochi y cu a resulta den detencion. Speru cu otro aña tur hende ta mas consciente y cu respet pa nan mes. Si bo no por controla e alcohol keda cas pa evita problema pa bo mes y otro.

(7) Un palabra di pabien na Cuerpo Policial, cu ta forma parti di e team di stakeholders pa cuida Carnaval. Nan a traha hopi overtime pero a traha pa cuida nos ciudadanonan, hasta Momo a mira un polis yuda pusha un roadpiece pa no tranca e parada. Tambe na Ambulance, Brandweer, DOW, DIP y DTI y miembronan di SMAC.

(8) Momo a keda sorprendi cu Festival di Tumba. Momo a kere cu ta bay bira un cos di un ora pero Momo a ekiboca, tabata un anochi di bon tumba. Mi ta spera cu e tumberonan haci nan esfuerso pa presenta Tumba aki mes na Aruba. Si bo ta biba aki lo ta great pa bo tumba zona aki tambe.

(9) Momo a gusta e idea cu miembronan di SMAC a laga traha un trahe Carnavalesco pa nan luci durante e ultimo dos paradanan. Boso a keda unico, Momo ta aprecia e esfuersondí boso banda.

(10) Momo a haya hopi falta di figuranan clave canto di caminda ora mi a haci mi recorrido riba e ruta di Carnaval. Ta prome biaha cu Carnaval ta riba caya sin worde compaña pa e bos y programa Aki Aya tur diadomingo mainta. Ta hopi aña Momo a gosa di e programanan di nos amigo Ruben Garcia. Mi ta spera cu unda cu Scorpio ta e ta contento di loke Aruba ta produci. Papiando di produci tambe Momo a haya falta di el gordo que produce Roberto A Geerman cu semper tabata presenta su Carnathon. Boso a haci falta.

(11) Carnaval ta yegando na su final. Momo ta hopi cansa, mi sa cu nos ta gusta Carnaval, pero nos tin hopi parada, ta con nos ta bay haci otro aña pasobra otro aña Carnaval ta caba dia 11 di februari. Momo ta recomenda kisas pone menos parada pero no asina hopi pasobra mi pia, lomba, heup tur cos ta dolor, kisas ta e edad?

(12) Momo ta recomenda SMAC pa corda un poco riba historia di Carnaval. Ta na unda atrobe nan a subi caya cu trahenan di Carnaval y tocando riba nan bari y tabata worde manda cas pasobra no tabata permiti pa celebra Carnaval riba caya. Si San Nicolaas. Momo ta recomenda pa pone un atencion special na San Nicolas.

(13) Na prins y pancho grandi y adulto, na reina Adri y Señora Carnaval Shera, unda cu boso bay, unda cu boso draai hinca Carnaval den boso zwaai. Ami ta cla pa bay pero mi n' ta yora malay pasobra otro aña ta setenta y nos ta pa nos cuenta.

Mi kier a laga boso cu e mensahe aki:

Ban mostra mas empatia, mas solidaridad, mas comprendemento. Uni nos por sigui bay dilanti, semper reconociendo e balor y capacidad y potencial creativo di nos hendenan. Ban reconoce e balor di arte y cultura y di creatividad. Ban ta consciente cu Carnaval ta un di e festivalnan cultural mas importante di nos isla. Aportando inmensamente na Aruba su economia.

Ban laga nos carnaval sigui briya, Un Saludo Carnavalesco.

